

BAB V

KACINDEKAN JEUNG RÉKOMÉNDASI

5.1 Kacindekan

Ieu panalungtikan téh miboga tujuan pikeun nganalisis jeung ngadéskripsikeun kasalahan morfologis, dina téks biantara siswa kelas IX SMP Pasundan 4 Bandung taun ajaran 2014/2015. Dumasar kana hasil analisis jeung déskripsi data, tina 107 karangan kapanggih aya 201 kecap anu ngalaman kasalahan morfologis.

Dumasar kana hasil panalungtikan jeung pedaran, bisa di cindekkeun tilu hal anu patali jeung kasalahan morfologis dina téks biantara siswa. Éta tilu hal téh ngawengku: (1) kasalahan ngalarapkeun wangun kecap rundayan, (2) kasalahan ngalarapkeun wangun kecap rajékan, jeung (3) kasalahan ngawangun kecap kantétan .

Kahiji, kasalahan ngalarapkeun kecap rundayan anu nyoko kana kasalahan ngalarapkeun rarangkén hareup, kasalahan ngalarapkeun rarangkén tengah, kasalahan ngalarapkeun rarangkén tukang, kasalahan ngalarapkeun rarangkén barung, kasalahan ngalarapkeun rarangkén gabung, kasalahan interférénsi morfologis, jeung kasalahan analogi morfologis.

Kasalahan ngalarapkeun rarangkén hareup jeung tukang, ngawengku: (1) kasalahan dina milih rarangkén, (2) kasalahan maké rarangkén, jeung (3) kasalahan enteu maké rarangkén.

Sedengkeun kasalahan interférénsi morfologis, ngawengku (1) kasalahan maké rarangkén basa Indonesia dina kecap asal basa Sunda, (2) kasalahan maké rarangkén basa Sunda dina kecap asal basa Indonesia, jeung (3) kasalahan maké rarangkén jeung kecap asal tina basa indonésia.

Kadua, kasalahan ngalarapkeun wangun kecap rajékan anu nyoko kana kasalahan ngalarapkeun wangun kecap rajékan dwimurni, jeung kasalahan ngalarapkeun wangun kecap rajékan dwipurwa.

Kasalahan ngalarapkeun wangun kecap rajékan dwimurni jeung dwipurna, ngawengku: (1) kasalahan milih wangun kecap rajékan, (2) kasalahan maké

wangun kecap rajékan interferensi tina basa indonésia, jeung (3) kasalahan ku sabab henteu dirajék.

Katilu, Kasalahan dina ngalarapkeun wangun kecap kantétan. Kasalahan dina ngalarapkeun wangun kecap kantétan kawilang pangsaeutikna. Tina 107 téks biantara nu dianalisis ngan kapanggih sakecap.

Kasalahan dina ngalarapkeun wangun kecap rundayan mangrupa kasalahan anu panglobana dipilampah siswa. Masih loba kekecapan anu diwangun balukar intérférensi tina basa Indonesia. Loba siswa anu ngawangun kecap rékaan tina kecap injeman basa Indonesia jeung pacampurna rarangkén tina basa Indonesia. Ieu nuduhkeun yén siswa kelas IX SMP Pasundan 4 Bandung taun ajaran 2014/2015 can paham kana prosés morfologis utamana dina prosés ngararangkénan kecap.

5.2 Rékoméndasi

Dumasar kana hasil panalungtikan ngeunaan kasalahan morfologis dina téks biantara siswa kelas IX SMP Pasundan 4 Bandung taun ajaran 2014/2015, ieu di handap baris diébréhkeun sababaraha rékoméndasi.

1) Pikeun Guru

Dina nulis téks biantara, siswa loba kénéh ngalakukeun kasalahan utamana dina prosés ngararangkénan jeung ngawangun kekecapan anu kapangaruhan ku basa Indonesia. Éta hal téh bisa jadi cecekelan pikeun guru sangkan leuwih jero deui dina ngajéntrékeun kaédah morfologis. Dina pangajaran nulis, hasil tulisan siswa lain ngan saukur dipeunteun wungkul, tapi kudu dipariksa tuluy dioméan nu salahna sarta dituliskeun catetanana keur siswa. Éta hasil mariksa téh tuluy bagikeun deui ka siswa, sangkan siswa nyaho yén dina tulisanana téh masih kénéh aya nu salah.

Pangajaran ngeunaan kaédah morfologis perlu diajarkeun sacara inténsif ka barudak sakola minangka salasahiji tarékah pikeu nyingkahan kasalahan makéna basa, utamana dina ngawangun kecap rékaan.

2) Pikeun Siswa

Siswa kudu leuwih merhatikeun dina prosés ngararangkénna, siswa kudu bisa ngabédakeun mana rarangkén dina basa Sunda, mana rarangkén dina basa Indonesia. Salian ti éta, siswa kudu leuwih ngeuyeuban deui kosa kecap basa

Sundana, ulah nepi ka nyampurkeun kekecapan basa Sunda jeung basa Indonesia. Kudu bisa milih wangun rarangkén, wangun rajékan jeung kantétan anu saluyu jeung kontéks kalimah.

3) Pikeun Panalungtik Satuluyna

Ieu panalungtikan téh museur kana kasalahan morfologis dina téks biantara siswa kelas IX SMP Pasundan 4 Bandung taun ajar 2014/2015. Ieu panalungtikan ngan saukur nganalisis kasalahan morfologis tina wacana tulisan wungkul. Data nu leuwih lengkep tangtu kudu aya sumber wacana lisan. Ku kituna, panalungtikan kasalahan morfologis téh masih bisa dituluykeun, pangpangna anu maké sumber data basa Sunda lisan.